

Discussion générale

M. Emile Calmes (DP).- Här President, Dir Dammen an Dir Hären, de Rapporteur huet, mengen ech, d'Wichtigkeet vun deem Gesetz hei ënnerstrach, déi nach emol ënnermauert gët duerch d'Tatsaach, datt fir eng Kéier den Avis vum Staatsrot virum Dépôt vum Projet de loi do as. De Staatsrot huet säin Avis nämlech schon de 16. Mee 1995 eragin, an de Projet as eréischt den 20. Juni 1995 déposiert gin. Et versteet een dofir am Fong geholl nët, firwat de Projet du 4 Jor am Tirang verschwonnen as, ier en erëm erausgefëscht gin as, fir dann haut um Ordre du jour ze sin.

Dat soll eis, mengen ech, nët dovun ofhalen, dee Projet hei ze stëmmen. Ech mengen, de Projet as gutt, an d'demokratesch Partei wäerd hir Zoustëmmung och hei gin.

M. le Président.- Als nächste Riedner as den Här Greisch agedroen.

M. Mathias Greisch (LSAP).- Här President, ech wëll am Numm vun der sozialistescher Fraktioun eis Zoustëmmung zu dësem Accord gin, an ech si frou, dass deen Accord, dee schon 1993 ënnerschriwwen gin as, elo endlech ëmgesat gët.

M. le Président.- D'Wuert huet elo den Här Camille Gira.

M. Camille Gira (DÉI GRÉNG).- Här President, elo wou deen Accord vill méi eng friedferteg Ausriichtung huet, hun déi Gréng och kee Problem, dësem Projet de loi zouzestëmmen.

M. le Président.- D'Diskussioun wir elo ofgeschloss, a mir kommen zur Lecture vum Article unique.

Lecture du texte du projet de loi (par M. Jean Spautz)

Den Article unique as gelies an ugeholl. De Vote vum Projet as an enger nächster Sitzung.

Da kéime mer zum nächste Punkt vun eiser Tagesordnung, der Proposition de loi 4539 vum Här Robert Garcia iwwer d'Centrale culturelle Belval. Esou wéi et am Artikel 59 vum Châmbrelement festgehalten as, stün dem Auteur vun der Proposition de loi, der Regirung an dene 5 Fraktiounen jeweils 10 Minutte Riednerzäit zur Verfügung. Et hu sech schon ageschriwwen: déi Häre Glesener, Berger an d'Mme Mutsch.

D'Wuert huet elo den Auteur vun der Proposition, den honorablen Här Robert Garcia.

8. Proposition de loi 4539 de M. Robert Garcia autorisant le gouvernement à créer

1. l'établissement public "Centrale culturelle Belval" et

2. autorisant cet établissement public à participer comme membre fondateur au groupement d'intérêt économique "Société de gestion de l'espace Belval"

Proposition de loi 4540 de M. Robert Garcia autorisant le gouvernement à créer

1. l'établissement public "Université européenne Terres Rouges" et

2. autorisant cet établissement public à participer comme membre fondateur au groupement européen d'intérêt économique "Campus universitaire européen Terres Rouges" à Esch-Alzette

Rapports de la Commission de l'Economie et de l'Energie et de la Commission de l'Education nationale et de la Formation professionnelle

M. Robert Garcia (DÉI GRÉNG), auteur.- Merci, Här President. Ech wäerd déi zwou Propositions de loi beieneen huelen, dann as d'Diskussioun vläicht och nët esou laang.

Normalerweis, bei Projets de loi, as dat éischt, wat ee mécht, dem Rapporteur merci ze soen. An dësem Fall as dat jo nët méiglech. Ech wëll awer vun der Geleënheet profitéieren, fir denen...

(Interruption)

Souwäit sin ech nach nët!

...Leit souwuel aus dem Secteur public, wéi och dem Secteur privé merci ze soen, déi un dëse Propositions de loi an hirer Fräizäit a sans préjudice vun hirem Devoir de retenue matgeschafft hun, fir dass et an där relativ komplexer Matière zu engem koherenten Text komm as.

Drai Objektiver verfolgegen ech mat denen zwou Propositions de loi:

- deen éischten Objektiv as deen, fir déi bis elo relativ theoretesch Diskussioun iwwer d'Zukunft vun den Industriebranchen op en Niveau vun e bësse méi prakteschen a realistesch - oder realisabele - Projeten ze bréngen;

- den zweeten Objektiv as deen, fir eng Reflexioun driwwer ze féieren, wéi eng optimal Gestionsstrukture fir eng deelweis öffentlech an deelweis gemëschten Nutzung vun dene spéidere Projeten ee kann an d'A faassen, an

- den drëtten Objektiv as deen, fir d'Diskussioun, déi éiweg Diskussioun iwwer den universitäre Standuert Lëtzebuerg duerch eng nei a ménger Meinung no sënnvoll Perspektiv ze beliewen.

Vläicht e kuerzen Historique: ech wëll renvoyéieren op den Dépôt vun enger Proposition de loi iwwer d'Krëatioun vun engem Parc régional Minett vu virun zwee Jor. Déi Proposition as zwar nët telle quelle ugeholl gin, mä ech hu mer misse soë loosse, vum Här Juncker hei op der Tribün, dass d'Regirung zumindest déi Iddien, déi an där Proposition de loi enthalte sin, ugeholl huet an och a Richtung vun engem Syndicat à vocation multiple geet, fir déi Gestoun vun den zukünftege regionale Struktur vum Minett ze maachen.

Ech wëll och renvoyéieren op eng Proposition de loi, déi ech virun 3 Jor gemaacht hun iwwer d'Fondatioun Janis Joplin, iwwer d'Gestioun vun der Rockhal. Do muss ech e bësse mat Nostalgie net nëmmen op d'Janis Joplin, mä och op déi Proposition zréckkucken, well ech hat mer deemools gesot, et wär vläicht net schlecht, wann ee sech am Virfeld, ier een ufänkt ze bauen an Aménagermenter ze maachen, eng konkret Virstellung mécht iwwer d'Gestiounsstrukturen; da wéisst een éischter, wou een histeiert.

An den 3 Jor hätt ee kënne laang iwwer déi Gestiounsstrukturen diskutéieren, an ech hun och misse feststellen, wéi den Här Bodry de Projet de loi iwwer d'Rockhal déposéiert huet, dass hie selwer och nach keng fix Iddien hat iwwer d'Gestiounsstrukturen. Mir hätten eigentlech 3 Jor Zäit gehat, fir doriwwer ze diskutéieren.

En drëtten Punkt vum Historique as, dass mir an eiser Partei - Stéchuert Plattform iwwer d'Edukatioun - relativ konkret Virstellungen iwwer den Uni-Standuert Lëtzebuerg formuléiert hun.

Zu där éischter Proposition de loi, nämlech där, fir op dem Site vun Terres rouges souwuel eng Université européenne ze maachen, wéi och e Campus universitaire européen wëll ech kuerz agoen op de Site selwer. D'Friche Terres rouges as net nëmmen eng vun denen eelste Friche hei am Land, mä si situéiert sech eigentlech ideal fir transfrontalière Projeten; well et as eigentlech nieft dem PED déi Friche, déi am noosten u Frankräich as a sech egent, fir eventuell eng Extensioun iwwer d'Grenzen eraus ze maachen. Anerersäits as et awer och déi Friche, déi sech am beschten egent, fir an enger Agglomératioun selwer déi Projeten anzubannen, nämlech an der Agglomératioun vun der Stad Esch.

Wat beinhalt elo dee Projet vun enger europäescher Universitéit? Ech wëll eben do alle Malentendu virbauen, fir ze soen, mir wëilten elo entweder de CUNLUX vum Lampertsbiert op d'Terres Rouges verfrachten oder eng Uni op Terres Rouges maache fir Lëtzeburger Studenten.

Mir gesinn am universitäre Beräich zu Lëtzebuerg eigentlech véier Créneauën:

- dat eent as, dass am Kader vum CUNLUX vläicht nei, komplett Cyclé geschafe gi fir Saachen, déi mir wëllen zu Lëtzebuerg promovéieren, sief et am Multimedia-, am Finanz- oder an anere Beräicher;

- den zwete Créneau wär den, och am Kader vum CUNLUX, fir ze kucken, ob mer net am Kader vun enger regionaler Universitéit, zesumme mat den aneren Instituter zu Tréier, Metz, Nanzeg, Arel, Saarbrécken, den een oder aneren Institut op Lëtzebuerg kéinte kréien, den da komplementar zu den aneren Universitéite wär;

- den drëtten Créneau as d'Schafung vu Weiterbildungsinstituter, haaptsächlech och enger Vollekshéichschoul, an

- den véierte Créneau - dat as den, den dee spezifesch Site hei betrëfft - as den vun enger europäescher Universitéit.

Wat heescht dat? Mir gesinn zwou Identitéitsfilière fir esou eng Universitéit:

- éischters déi voll Notzung vum europäesche Charakter vum Site Lëtzebuerg a vun der Regioun, d.h. dat, wat de Moment op esou monolinguesche Site wéi Bruges oder Florenz passéiert, nämlech europäesch Studien, op e Site ze bréngen wéi Lëtzebuerg, wou et jo awer net nëmmen e multikulturellen, multilingueschen oder multilinguale Kontext gëtt, mä wou et awer och ganz vill Leit um Terrain gëtt, déi aus ganz verschiddene Länner kommen an do kéinten e ganz wäertvollen Apport hun;

- déi zweet Identitéitsschinn wär déi vun der Komparatistik. Wann een e bëssen am wëssenschaftleche Beräich an Europa doheem as, da weess een, dass et tëscht den angelsächsegen, däitschen, skandinaveschen, latäineschen oder fransésche wëssenschaftleche Schoulen op alle Gebidder immens Divergenze gëtt, an oft, wann ee wëssenschaftlech Texter liest aus dem psychologesche Beräich, aus Frankräich, aus England oder aus Däitschland, da mengt een, et géif ee vun engem ganz anere Fach schwätzen.

Do wir Lëtzebuerg, well Lëtzebuerg jo och vill Studentinnen a Studenten huet, déi an anere Länner studéiert hun an op Lëtzebuerg nees zréckkommen, en idealen Nährbuedem, fir eng komparatistesche Universitéitskultur opzebauen.

Ech wëll direkt virbauen: mir wëllen net, dass d'Lëtzeburger Studentinnen a Studenten net méi sollen an d'Ausland goen. Den Zilpublikum, den hei viséiert as, as haaptsächlech den vun auslänneschen, mä och lëtzebuergeschen Studenten, déi haaptsächlech den troisième Cycle maachen, Doktorater, Recherchen oder komplementär Studië maachen.

Déi Studente sollen eben op Lëtzebuerg aus der Regioun an aus ganz Europa kommen, a si sollen an Institute entweder fuerschen oder léieren, déi opbauen op der linguistescher Vielfalt, um multikulturelle Charakter vun eiser Regioun an op där ekonomescher Dynamik, déi eben an eiser Regioun net ze verkennen as.

Wéi eng Strategie läit dann elo deem Gesetzesvorschlag hei zu Grond? Mir wëllen a verschiddenen Etappe virgoen.

De Stat schafft e weideren Etablissement public, ähnlech wéi de CUNLUX, den awer nëmmen op déi europäesch Studien axéiert as, an e schafft selwer eng hallef Dosen Institute, déi et eigentlech schon zu Lëtzebuerg misst gin, well Lëtzebuerg do eng Kompetenz huet. Ech gesinn net an, fir wat dass et eng europäesch Rechtsakademie zu Tréier gëtt, oder en europäesch Tourismusinstitut, an net zu Lëtzebuerg, wou Lëtzebuerg sech jo awer vu senger europäescher Vokatioun hir als éischt géif cegenen, fir esou eppes ze beherbergen.

Weider kënnt een och an de sozialwëssenschaftleche Beräich goen, zum Beispill europäesch Sozialgeschicht, Medien, nei Technologien, Droit, Finanzen. Et gin u sech sécherlech eng sëllege vun Iddiën, déi kënnten esou éischt Instituter hun.

Deen zwete Schrëtt as, dass deen Etablissement public op deem Site "Terres Rouges" do eventuell géif funktionnéieren, an da seet een, okay, mir hun hei e Kär, a ronderëm dee Kär soll een eng akademesch Zon, e Campus opbauen.

Et géif een also eng Prospektiounspolitik maachen, ähnlech wéi mer et de Moment maachen, an eigentlech as déi Proposition hei näischt anescht wéi eng traditionell Fortsetzung vun der Lëtzebuerger Nischepolitik.

Mir haten d'Nischepolitik vun de Banken. Mir hu se versicht, am Mediësektor ze maachen, a bis elo huet déi Nischepolitik sech opgebaut entweder op Souveränitéitsnischen am Beräich vun der Fiskalitéit oder a Fördermoossnamen, déi et awer am Moment ëmmer méi schwierig as, am europäesche Kontext duerchzebréngen.

Do, wou eis Nisch sech opbaut, as eigentlech e Lëtzebuerger "brain"-Kapital, deen zu Lëtzebuerg schon do as, deen een net muss duerch irgendwelch gesetzlech Moossname schützen. Dat heescht, mir bauen eigentlech op engem eegene Kapital op, dat de "brain-trust" vu Lëtzebuerg as, an domat versiche mer quasi, wéi mer freier versicht hun, Banken unzelackelen, europäesch Instituter unzelackelen.

Dat kënnen Dépendancë vun öffentliche Universiteiten aus dem Ausland sin. Et kënnen Dépendancë vu privaten Unië sin. Et kënnen Dépendancë vun amerikaneschen Universitéite sin, ähnlech wéi mer se jo hei vu Miami hun. Et kënnen mixte Structure sin, et kënnen nei Instituter sin. Ech mengen, do as der Phantasie keng Grenze gesat, an ech ka mer och imaginéieren, dass d'europäesch Institutiounen interesséiert sin, fir an deem Beräich matzehëllefen, fir eng europäesch Forschungsrichtung auszubauen.

Ech muss soen, ech fannen déi Iddi hei immens gutt. Et muss een dat an aller Bescheidenheit soen. De Goethe sot schon "nur Lumpen sind bescheiden, der Tüchtige erfreut sich seiner Tat". Ech fannen déi Iddi immens gutt, mä wat elo de Site ubelaangt, do kann een natierlech soen, et gëtt immens vill Siten. Ech hun dee Site "Terres Rouges" erausgesicht aus verschiddene Grënn.

Eischtens as e symbolesch ganz wichteg, well en as op der Grenz. Dat heescht, eng Ausdehnung, déi duerchaus méiglech as, wann een d'Pläng kuckt, a Frankräich géif dozou féieren, dass mer no dem PED en zweeten transfrontalière Projet hätten, dee mat enger europäescher Vokation kënnt Schoul maachen an och eng wichteg Signalwirkung wär, wann ee wëllt esou Instituter aus dem francophonen oder dem däitsche Beräich ulackelen.

Et muss een awer och soen, dass et eng Signalwirkung wär fir d'Minettregioun, déi jo awer bis elo ëmmer ausschliesslech en industrielle Charakter hat. Deen indus-

trielle Charakter vun der Minettregioun geet och ni verluer, a mir wäerten den nächste Mëttwoch Geleënheet hun, doriwwer ze schwätzen, mä et as awer vläicht wichtig, dass een duerch esou eng Implantatioun en neie Crénau mëtten an de Minett setzt, op eng wirklech neuralgesch Plaz. Doraus kënne sécherlech och nach aner Dynamiken entstoen am Beräich vun der Fuerschung. Ech denken och un aner Institutiounen, déi et jo scho gëtt, wéi de CEPS/INSTEAD zu Déifferdeng oder de Schlassgaart zu Esch. Et as doduerch, dass en universitären Noyau do as, dass do eng nei Dynamik kann entstoen.

Ech sin iwwregens och domadder op där selwechter Linn wéi de Wirtschaftsminister Goebbels, deen d'lescht op enger Pressekonferenz gesot huet, dass d'Fele vun universitäre Strukturen och fir d'Lëtzebuerger Economie net onbedéngt ganz gönschteg wär.

Ech kommen dann zu där zwoeter Proposition de loi, Här President. Dat as déi iwwer d'Installatioun vun enger Centrale culturelle zu Belval.

Ech wollt dee Projet eigentlech am Ufank Kulturschmelz oder Kulturfabrik nennen, mä dat gëtt et jo schon, a vu dass et jo d'Kärstéck as vun deem Projet iwwer d'Centrale soufflante, hun ech se Centrale culturelle genannt.

Ech wëll jhust an dräi Wieder den Historique maachen. Ech mengen, et huet ugefaange mat eiser Motioun hei an der Châmber, fir den Héichuewen A ze erhalten. Et as weidergaange mat der Motioun iwwer den Héichuewen B. Oder war et ëmgekeiert?

Dun huet d'Kulturministerin de Groupe de travail Linster installéiert, deen awer elo schon eng ganz Parti vun interessanten Iddiën an deem kulturelle Beräich formuléiert huet, wou ech och drop waarden, dass irgendeng Form vun Aménagementsgesellschaft higeet an dee Site do, net nëmmen d'Rockhal, aménagéiert.

Wourobber steiere mer hin op dem Site vu Belval-Ouest? Mir steieren engersäits hin op en Espace public an anerersäits op en Espace privé.

Den Espace public begräift an e puer Jor eng Rockhal, e begräift e Musée vun den Héichuewen, plus e Musée vun der Geschicht vun der Sidérurgie. Et as och virgesinn, en Espace vun der Recherche technologique zu Lëtzebuerg ze maachen.

D'Iddi schwieft och am Raum, fir eventuell eng Maison de la Région oder eng Maison de la Grande Région do ze installéieren. Dat sin awer lauter Instituter, déi en öffentliche Charakter hun.

An hei schloë mir vir, dass dat ënnert der Regie vun engem Etablissement public soll geschéien, deen dat ganz géréiert. Dat verhënnert net, dass zum Beispill am Kader vun der Rockhal och Privatheit mat dra kommen. Mä deen Etablissement public as en Daach, fir dass innerhalb vun deem kënnen eng ganz Rei vu méi flexiblen Aktivitéite geschéien.

Dann hu mer awer och op deem Site Belval eng Parti vu private Strukturen, déi sech annoncieren. Zum Beispill de Kinokomplex, zum Beispill dat, wat mir virschloen, e Wellness-Center, deen opbaut op där Quell Belval, déi jo hoffentlech nët verseucht as, déi dann eventuell kënnt am Kader vu Wellness an aneren Aktivitéiten do spruddelen, a quasi en zweet Mondorf oder en zweet Biekerech do kéint entstoen. Ech wëll hei kengem Konkurrenz maachen.

Et gët och Leit, déi do wëllen Espaces commerciaux maachen, wou een awer muss ganz virsiichteg sin. Mir sin op alle Fall nët Befürworter dovun, fir do en neie Supermarché hinzesetzen.

Jiddefalls, eis Suerg war folgend: wann elo herno op Belval een Deel kulturell Aktivitéiten ënnert der Regie vum Pouvoir public, Stat oder Gemenge passéiert, an anerersäits Aktivitéiten an deem hallef kulturellen an hallef kommerzielle Beräich, da muss een dat awer irgendwéi ënnert een Hutt bréngen, well soss geschitt dat, wat um Kiirchbiereg geschitt, dass jiddereen eigentlech dat mécht, wat e wëllt, an herno guer keng Identitéit do as.

An do hun ech ganz laang mat kompetente Leit diskutéiert an iwwerluegt, wéi eng Gesellschaftsformen et do gët, an do gët et keng Honnerttausend. Mir sin zur Konklusioun komm, dass et am beschte wir, et géng een en Etablissement public maache fir déi reng kulturell Aktivitéiten, an déi Form vum Groupement d'intérêt économique egent sech hervorragend dofir, fir Aktivitéiten ënnert een Hutt ze bréngen, déi deelweis privat, deelweis öffentlech sin, ouni dass déi Aktivitéiten irgendwéi sech iwwerschneiden. Jidderee mécht eigentlech, wat e wëllt, mä alles, wat gemeinsam as, sief et d'Gestioun vun den Espaces verts, sief et d'Publicitéit no baussen, sief et den Aménagement vum Site, siefen et aner Aktivitéiten, ka vun engem Groupement d'intérêt économique gemaacht gin. Dee ka souguer europäesch gemaacht gin, well op Terres Rouges schloë mer vir, dass dat e Groupement européen soll sin. Do kann ee souguer Partner aus dem Ausland mat eranhuelen, siefen et Gemengen, siefen et privat Firmen.

Ech géif elo gär deen héieren, dee mir do eng besser Gesellschaftsform proposéiert, sief et als s.a. oder als s.à r.l., well déi hun alleguer hir Nodeler fir de Secteur public, deen oft Gefor leeft, an enger s.a. oder an enger s.à r.l. de Kierzeren ze zéien.

An en Etablissement public kann ee keng Privatfirma mat erabrénge. De GIE as effektiv déi eenzeg Form vu Gesellschaft, déi kann déi zwou Tendenzen ënnert een Hutt bréngen.

M. René Kollwelter (LSAP).- Här Garcia, därff ech Iech eng Fro stellen?

(Assentiment)

Här President, ech hun dem Här Garcia nogelauscht. Ech wëll hien drop opmierksam maachen, dass et, zwar nët an eiser Législatioun, mä an anere Législatioun-

nen, nach en anert Instrument gët, d'Société d'économie mixte. Ech mengen, mir wäre gutt beroden, wa mer eis géifen esou en Numm och hei zouleën, fir kënne denen dote Saache gerecht ze gin.

M. Robert Garcia (DÉI GRÉNG), auteur.- Wéi esou oft, Här President, kann ech nëmme mam Här Kollwelter d'accord sin.

M. René Kollwelter (LSAP).- Déi grouss Geeschter begéine sech!

M. Robert Garcia (DÉI GRÉNG), auteur.- Voilà! Et as wierklech un der Zäit, dass mir eis esou Strukture gin, well zum Beispill den Etablissement public a Frankräich huet méi Moyenë wéi deen hei zu Lëtzebuerg, fir mixte Aktivitéiten unzegoen. Et muss vläicht emol nët e ganz neien Typ geschafe gin, mä et as méiglech, op bestehende Strukturen denen hir Kompetenzen auszeweiten.

Ech wëll mech nët do ausloossen, mä ech hu mat ville Leit doriwwer geschwat. Et as eng Matière, wou ee kann endlos diskutieren, mä wann een elo hei wëllt eppes maachen, as de GIE momentan leider déi eenzeg Form an déi huet och nach den Nodeel, dass en näischt ka vu sech selwer maachen. Dee ka jhust Aktivitéite koordinieren, mä jiddereen an deem GIE mécht, wat e wëllt. An dat as e bësse schued, well do gin natierlech och eng Parti Saache verluer.

Ech kommen dann zu ménger Konklusioun, Här President. Wéi gesot, hei leien elo emol fir d'éischt Kéier zwou konkret Propositione fir den Aménagement vu Friches industrielles an der Minett vir. Et kënnt een och anerer aménagieren. Ech hat geduecht zu Diddeléng, well de CNA kënnt jo op eng Friche industrielle, an et kënnt een drun denken, fir do en Zenter ze maache fir Productions cinématographiques a Studioën ze installéieren.

Et kënnt een zu Déifferdeng Saache maachen, et kënnt een nach op anere Sitë Saache maachen. Ech mengen, et as un der Zäit, dass mer vläicht sollen aus där frileuser Haltung, déi mer ëmmer par rapport zu de Frichen hun, erauskommen a konkret Propositionen op den Dësch bréngen.

Et kann een déi Propositione gutt fannen oder nët, mä zumindest bréng se awer d'Diskussioun weider, an ech hoffen, dass mer e Mëttwoch vläicht d'Geleënheet hun, nach méi generell ze diskutieren iwwer d'Zukunft vun de Friches industrielles am Minett an iwwer konkret Projeten. Ech hoffen, dass des zwou Propositions de loi dozou bäigedroen hun, fir d'Diskussioun ze beliewen.

Ech soen Iech merci.

M. le Président.- Mir diskutieren dann déi zwou Propositions de loi, wéi den Här Garcia et virgeschloen huet, zesummen. Ech gesinn, et sin och déi selwecht Orateurs bei denen zwou.

Als éischte Riedner huet den Här Marcel Glesener d'Wuert.

Discussion générale

M. Marcel Glesener (CSV).- Här President, ech schléissen do un, wou den Här Garcia opgehale huet, wéi e gesot huet, déi nächst Woch kréiche mer d'Geleënheet, fir iwwer dee ganze Komplex ze diskutéieren. Dat as richteg.

Mir kréien also déi nächst Woch d'Geleënheet, fir iwwer dee ganze Komplex vun den Industriestanduerter am Süden ze diskutéieren, wou déi Propositions de loi, déi den Här Garcia gemaacht huet, en Deelaspekt dovun sin, wou ee praktesch schon de Standuert definéiert an da versicht, fir déi zwee Standuerter eng Gesellschaftsform ze déterminéieren an dat Konzept dann och ze réaliséieren, wat scho besteet.

Ech géif zu denen zwou Propositione vum Här Garcia soen, dass se virun allem de Wäert hun, dass ee sech am verstärkte Mooss an ofschléissend - well et gët bal Zäit - mat där ganzer Problematik ausenanesetzt.

Mir hun zu Esch zwee ARBED-Standuerter, wou säit laanger Zäit op Terres rouges keng Stolproduktioun méi stattfënt. Et as dat u sech eng industriell Ruin, déi do steet, schon iwwer e Jorzéngt, wou et noutwendeg as an héich Zäit gët, ze diskutéieren a festzeleën, wat d'Déterminatioun vun deem Standuert as.

Zum aneren hu mer op ARBED-Belval e ganz staark ageschränkten industrielle Standuert, wou nach industriell Produktioun weiderleeft, mä doriwwer eraus hu mer awer e groussen Deel vun Terrainé mat Installatiounen, déi sech eegnen, fir deem Site eng aner Déterminatioun ze gin, fir eng industriell Produktiounseenheet, déi een eventuell och kënnt op dee Standuert setzen.

Zwou Froë misst ee virrangeg klären, an dofir as et gutt, dass den Här Garcia e bësse Virreider as mat sänge Propositions de loi, dass ee sech iwwer zwou Saache schnellstméiglech eens gët.

Dat eent as, dass ee muss ee fir allemol déterminéieren, wat op denen eenzelne Standuerter soll geschéien.

Zwetens muss et dann awer och schnellstméiglech klor gin, sech festzeleën iwwer d'Besetzverhältnissen an d'Konditiounen, wie wat op dene Standuerter soll maachen.

Dat sin Diskussiounen, déi ee muss féieren, ier een esou konkret - wéi den Här Garcia dat mécht - Forme presentéiert, déi déi Standuerter an d'Déterminatiounen vun dene Standuerter géréieren. Ech mengen, dat éischt muss Virrang hun. Dobäi wëll ech net soen, dass déi Iddi vum Här Garcia net räif wär, fir ze diskutéieren, oder net diskussiounswürdeg wär. Au contraire, et soll een doriwwer Iddien entwéckelen, an den Här Garcia huet schon engem Standuert praktesch eng Déterminatioun gin a senger Proposition de loi, deen nach keng huet, an dat as de Standuert vun Terres rouges.

Do kann déi Cité oder Entité universitaire européenne - wéi och ëmmer ee se wëllt nennen - eng Méiglechkeet

sin, mä ech mengen, et soll ee vir ewech awer mat der Gemeng Esch virun allem déterminéieren, wat op Terres rouges soll geschéien. As et noutwendeg oder besti Besoinen an der Stad Esch, fir zum Beispill neie Wunnraum ze schafen oder nei kommerziell Aktivitéiten? Alles dat misst ee mat an déi ganz Diskussioun afléisse loossen, fir dann zu enger Schlussfolgerung ze kommen, wat op Terres rouges soll geschéien.

Wann dat festläit, da misst ee sech driwwer klor gin, wéi an a wat fir enger Form dat géréiert ka gin. Da kann déi Iddi an déi Proposition vum Här Garcia een Aspekt dervu sin, an ënner Ëmstänn vläicht eng Finalitéit, woubäi et eis muss klor sin, datt mir net eleng zoustänneg si fir d'Erriichtung an d'Kreatioun vun enger europäescher Universitéit. Do kommen eng ganz Rei vun zousätzleche Problemer, mä et soll een awer déi Propositionen net einfach an den Tirang leën an déi Geleënheet notzen, fir effektiv iwwer déi zwou Saachen emol fir d'éischt ze decidéieren, iwwer d'Besetzverhältnissen, iwwer d'Definition vum de Standuerter, an dann iwwer d'Form, wie wat ka géréieren, datt et notzbréngend och ka funktionnéieren.

Dat as dat eent, an dat zweet, wat ech wëll soen, schéngt mer méi kuerzfristeg realisabel ze sin, an zwar d'Definition, déi schon zum Deel festläit, vum Standuert ARBED-Belval. Ech mengen, et as gutt, datt den Här Garcia déi Proposition de loi hei presentéiert, fir dat nach eng Kéier ze ënnermaueren, wat mer hei als Parlament den 11. Dezember 1996 beschloss hu bei Geleënheet vun de Budgetsdebatten, a Form vun enger Motioun, déi vun alle Parteien vum Parlament gedroë gin as, wou mer verlaangen, datt déi zwee Héichiewe sollen erhalte bleiwen, datt do soll e kulturellen Industriemusee ronderëm deen Héichuewen entstoën an doriwwer eraus "à étudier la possibilité de transformer lesdits hauts-fourneaux en musées industriels au sein d'un concept global de valorisation des sites d'archéologie industrielle du bassin minier."

Mir hun deemools eng Richtung festgeluegt, datt mer eis net op d'Héichiewe beschränken, mä datt doriwwer eraus effektiv um Site ARBED-Belval e Gesamtkonzept sollt enstoën, dat kultureller Aart as an och der Fräizäitgestaltung soll dengen, wou déi zwou Saache sollte matenee kombinéiert gin.

Do si mer elo och konfrontéiert mat engem Projet de loi vun der sougenannter Implantatioun vun der Rockhal, zu deem mir eng positiv Stellung bezéien. Ier een awer ufänkt, iwwer e Projet vun der Gestaltung vun der Rockhal definitiv hei an der Chamber ze decidéieren, missten och ganz klor d'Besetzverhältnissen virdru gekläert gin. Et wir net gutt, wann een elo déi Salamitaktik och hei als Gesetzgeber géif weiderféieren, déi d'ARBED vläicht wënscht a wëllt, wou se dem Stat wëllt Stéck fir Stéck eenzel Stécker verkafen. Ech mengen, dat as net dee richteg Wee.

Ech géif d'Regierung opfuerderen, schnellstméiglech déi Diskussiounen mat der ARBED weiderzeféieren an ofzeschléissen, fir datt ee weess, wat op eis zoukënnt. No-

deems een e Konzept huet a weess, wat ee wëllt op denen eenzelnen Industriestanduerter maachen, kann een dann op Grund vum Wonsch, deen ee fest definéiert huet, mat der ARBED iwwer de Besëtz an de Präis vun denen Installatiounen diskutéieren an dann ufänken, konkret dat Konzept ze verwicklechen.

An deem Sënn sin ech frou, datt d'Déterminatioun vun deem Deel vun ARBED-Belval zu engem groussen Deel definéiert as. Dat bedeit natierlech fir d'Infrastruktur, och um Gebitt vum Stroossebau a vum Accès, enorm Diskussiounen, déi mussen an deem ganze Kontext gefouert gin. Do si mer ee gudden Schrëtt virukomm, awer nach nët wäit genuch. De Moment as et richtig, datt d'Fondation Bassin minier u sech nët équipéiert as, fir dat kënnen ze maachen, mä datt eng Persoun, den Här Linsten, den Optrag kritt huet, fir e Grupp ze bilden, fir ee Konzept auszeschaffen. Déi sin am Moment och blockéiert, well se och nët méi wëssen, wat wëlle mer elo effektiv an der Finalitéit do maachen.

Deen Ansporn vum Här Garcia as richtig, fir datt ee sech Gedanke mécht iwwer ee Konzept, dat muss erstallt gin, a virun allem och, wien dat soll erstellen a wéi dat herno soll gëréiert gin. Déi Form, déi den Här Garcia hei presentéiert, as ménger Meinung no valabel. Ech kann elo nët soen - ech sin nët de Gesellschaftsrechtler -, ob dat déi bescht Form as. Et kéint ee sech och d'Fro stellen, datt mer vläicht eis Gesetzgebung iwwer d'Etablissements publics missten adaptéieren an aktualiséieren. Mir haten hei eng Diskussioun, wéi mer iwwer Fondatiounen an iwwer d'Participatioun vum Stat bei Fondatiounen geschwat hun, an do hu mer grouss Problemer gesinn, soudatt et och vläicht noutwendeg wir, datt een d'Gesetzgebung iwwer d'Etablissements publics eng Kéier géif hei an der Châmber aktualiséieren. Da kéint dat do mat Sécherheet eng Form gin, wéi een dee Site kéint valoriséieren an och lieweg gestalten.

Ofschléissend géif ech also soen, datt mer virun allem déi lescht Proposition solle weider vervollstännegen, an doriwwer eraus, datt et Zäit gët, ze wëssen, wouhin ee steiert. Dat hei soll, wéi gesot, en Ansporn sin, datt mer ofschléissend emol dat Konzept erstellen an dann iwwer d'Besëtzverhältnisser mat der ARBED diskutéieren.

Ech wëll awer och zesumme mam President méng Satisfaktioun zum Ausdrock bréngen iwwer déi vill Beméiungen, och vun aneren Deputéierten heibannen, déi eis ënnerstëtzt hun. Ech soen de Kollegen aus der grénger Fraktioun merci fir d'Erhale vun denen zwee Héichiewen op ARBED-Belval, déi eis zwee - dem Här Spautz a mir - besonnesch um Häerz leien. Een Deel dovunner as um gudden Wee, a mir sollten all Geleënheet notzen, wéi och elo dës vum Här Garcia, fir iwwer d'Weiderféierung vun dene Projeten hei ze beroden an zu engem Ofschloss ze kommen. Et as dat, wat ech als Vierter vun der CSV zu dene Propositionen wollt soen.

Ech soen Iech merci.

M. le Président.- D'Wuert huet elo den Här Eugène Berger.

M. Eugène Berger (DP).- Här President, Dir Damen an Dir Härren, dës Projets de loi befaasse sech mat der Revalorisatioun vun de Friches industrielles am Süden, an ech mengen, wann ech richtig am Bild sin, dann as et jo och esou, datt d'nächst Woch och nach Diskussiounen sin iwwer d'Problematik. Et wir vläicht och interessant gewiescht, wann een dat hätt kënnen zesummen an engem Jet diskutéieren, an dofir wäerd ech och nët zevill laang op déi verschidde Propositionen agoen. Ech wäerd nëmmen e puer méi allgemeng Remarque maachen.

Wann een iwwer d'Revalorisatioun vun de Friches industrielles schwätzt, da schneid een do och méi generell d'Problematik vum Aménagement vum Süden un. Mir wëssen alleguer, dass dës Regioun ganz vill zum Wuelstand vun eisem Land bäigedroen huet - ech denken do un d'Eisen- a Stolindustrie -, déi awer an dene leschten 20, 30 Jor bei der Entwécklung vun denen neien ekonomeschen an och kulturellen Aktivitéiten hei zu Lëtzebuerg ëmmer méi vergiess gin as. Et as prioritär a Richtung Zentrum geduecht gin. Dat hängt och sécher domat zesummen, datt d'Regierung keng global Visioun vum Aménagement du territoire huet, an och ganz besonnesch keng Visioun vum Aménagement vum Süden.

Den Här Bodry huet zwar elo rezent e Pabeier virgestallt, mä dat schéngt mer éischter e bësschen Aktivismus ze sin, besonnesch elo an den Zäite virun de Wahlen. D'Propositionen vum Här Garcia hun de Mérite, fir eng diesbezüglich Diskussioun och hei an der Châmber ze relancéieren. Hien huet hei e puer wierklech interessant a flott Iddien erabruucht, déi derwäert sin, fir weider diskutéiert ze gin, och um Niveau vun der Châmber.

Déi éischt Proposition vun der Centrale culturelle Belval zielt a Richtung vun enger Mise en valeur vun der kulturhistorescher Ierfschaft vun der Eisen- a Stolindustrie, déi jo wesentlech zum Wuelstand vun eisem Land bäigedroen hun. Dës Iddi kann d'DP nëmmen ënnerstëtzen, et sief, datt mer herno am Detail vläicht bei verschiddene Punkten oder Projeten e bësschen aner Virstellungen hun. Den Här Garcia proposéiert um Site Belval eng ganz Batterie vun Aménagements: e Musée, en Haus vun der Minette, e Kino, eng Rockhal, en Espace technologique, oder och nach méi kommerziell ausgerichten Aktivitéite wéi Geschäfte oder e Wellness-Center. Dat sin alles interessant Denkmäler, wou och schon eenzel Elementer, wéi zum Beispill dat vun der Rockhal, deemnächst méi konkret solle gin. Och hei kann ech mech nëmme méng Virriedner uschléissen, datt do - besonnesch wat de Projet vun der Rockhal ubelaangt - fir d'éischt muss ganz klor Verhältnisser geschafe gin, wat d'Besëtzverhältnisser ubelaangt, an datt een nët dierf iwwerstierzt e Projet diskutéieren an och eventuell votéieren, wou herno eng ganz Rei Froëzeechen opstoë bleiwen.

Et kann een elo nët am viraus soen, wat fir eng eenzel Elementer wäerte realiséiert gin, mä den Här Garcia huet och richtegerweis d'Noutwendegkeet erkannt, datt een do muss eng effizient Koordinatioun hun, datt ee virun allem virun der Planung, bei der Planung an herno bei der Gestaltung muss koherent virgoen an dat Ganzt vun enger

Stell aus gëréieren. Hei gët en Etablissement public proposéiert, deen dann och ka Member sin an engem Groupement d'intérêt économique. Dës Iddi fënt och - wéi een esou schéi seet - e Préjugé favorable bei eiser Fraktioun.

Wann een den Text kuckt zu den Etablissements publics, da schéngt dee mer vläicht e bëssche kuerz. Ech sin elo och kee Spezialist doranner, mä ech wëilt och hei drop hiweisen, dass d'DP scho méi laang e Kadergesetz fir d'Etablissements publics fuerdert; zu engem gegebenen Zeitpunkt, wann een do wëilt en Etablissement public maachen, kéint ee sech dann och deem Kadergesetz upassen.

Ech wëll och drop hiweisen, dass den Aménagement vum Süden awer och nët nëmmen där f' an eng Richtung goen, eng Richtung Disneyland, oder hei éischter Minettland, wou da jhust dru geduecht gët, fir kulturell Aktivitéiten ze initiéieren, fir eventuell Touristen unzezéien. Dat as zwar eng interessant Iddi. Mir hun och an engem DP-Pabeier iwwer Tourismus déi Iddi gehat, d' den Här Garcia a senger Proposition de loi gemaacht huet, fir e Circuit touristique ze maache mat anere Siten. Dat as ganz interessant, mä dat där f' awer nët nëmmen eleng de Süde sin.

De Süden als Standuert muss ekonomesch diversifizéiert a belieft gin, an dat heescht, dass mer nach musse weider Betriber an Dëngschtleeschungsservicer dohinner bréngen an och do musse kucken, weider ze diversifizéieren, a virun allem, dass mer do nach Aarbechtsplaze musse schafen. Do kéint de Stat eng gewëss Virreiderroll spillen an Effort maachen, zum Beispill andeems hie géif séng oder parastaatlech Servicer dezentraliséieren an och am Süden usidelen.

Am Kontext vun där zweeter Proposition, wou et ëm eng Université européenne geet, wëilt ech ënnersträichen, dass d'DP och fir en Ausbau vun den Héichschoulen, respektiv fir eng héichwäerteg Uni zu Lëtzebuerg antrëtt. Ech verweisen hei op eis verschidde Pabeieren, déi mer zu deem Sujet gemaacht hun. An eisem Pabeier "Eine Bildungsoffensive für Luxemburg" an an eisem Walprogramm ënnersträiche mer dat och, an et kann een och e ganz interessante JDL-Pabeier zu deem Sujet liesen.

M. René Kollwelter (LSAP). - As dee geheim?

M. Eugène Berger (DP). - Deen as nët geheim, Här Kollwelter. Wann Der Iech derfir interesséiert, da kann ech derfir suergen, dass Der och dee Pabeier zougestallt kritt. En as ënner anerem vum Mireille Hames, enger jonker Studentin, erstallt gin. Ech froen dann dee Pabeier no, an da kann ech Iech deen och iwwermëttelen.

M. René Kollwelter (LSAP). - As en nët um Internet?

M. Eugène Berger (DP). - Dach, Dir hut Recht, Här Kollwelter. Ech gesinn, Dir kennt eise Site och, dat as ganz gutt. Dir wäerd ee vun dene mëttlerweil 15.000 Visiteur gewiescht sin. En as och um Internet, awer ënner JDL.lu, an nët ënner DP.lu. Do fant Der de Pabeier och.

(Interruptions)

Op alle Fall, eng Uni géif ganz sécher eng Beräicherung fir Lëtzebuerg bréngen, dës a wëssenschaftlecher, kultureller an och ekonomescher Hinsicht. Et as awer och klor, dass eng Uni muss dem spezifische Lëtzebuerger Kontext ugepasst gin, dat heescht, dass ee misst Studienrichtungen eraussichen oder ubidden, wou e gewëssenen Know-how do as, oder och vläicht Fächer proposéieren, déi nach nët an de Grenzregionen, well mer do schon eng Rei Uniën hun, ugebuede gin, respektiv dass se complémentaire zu dene wieren. Et kéint ee sech zum Beispill virstellen, dass ee géif fir d'Wirtschaftswissenschaften, Jura oder Sozialwëssenschaften e kompletten Zyklus hei zu Lëtzebuerg ubidden.

D'Iddi vun enger europäescher Universitéit - esou wéi den Här Garcia dat och scho virgeschloen hat - as och pertinent, vu dass zu Lëtzebuerg jo verschidden europäesch Instituter present sin a mir ëmmer eng europäesch Vokatioun wollten hun.

Hei muss ee bedauern, dass an der Vergaangenheet nët éischter Jaloné gesat gi sin, well mir elo d'Konkurrenz vun Nopesch Instituter hun.

Eng Universitéit zu Lëtzebuerg heescht och nët, dass déi jonk Lëtzebuerger elo mussen zu Lëtzebuerg op d'Universitéit goen, mä si kënnen och weider an d'Ausland studéiere goen. Villmëi soll eng Universitéit hei am Land e Faktor vum Standort Lëtzebuerg gin, andeems en op där enger Säit nei Kompetenzen an d'Land bréngt, ech denken do u Wëssenschaftler a Spezialisten, an op där anerer Säit och fir auslännesch Studenten attraktiv gët, fir dass si op Lëtzebuerg studéiere kommen.

Donieft sollen och d'Kooperationsmodeller mat den Nopeschuniversitéiten op- an ausgebaut gin, wou een um Wëssensgebit regional zesummeschaffe kann.

D'DP steet also absolut positiv zu enger Universitéit zu Lëtzebuerg, an dës besonnesch am Süde vum Land. Fir ofzeschlësse si mir awer der Meinung, dass ee sech hei nët soll dës le départ op ee bestëmmte Site fixéieren. Aner Plazen am Süde géife sech och oder vläicht souguer besser dozou eegnen, hun och scho vläicht Ufank vun aneren Universitéiten oder Instituter an der Recherche. Et kann ee jo da kucken, wou dat sech am interessanteste realiséiere léisst.

D'Standortdiskussioun soll awer nët déi gréissten Hürd sin, an et wir wichteg, dass an den nächste Jore konkret Schrëtt a Richtung Universitéit zu Lëtzebuerg gemaacht gin.

Ech soen Iech merci.

M. le Président. - Lescht Diskussiounsriednerin as d'Mme Lydia Mutsch. D'Mme Mutsch huet d'Wuert.

Mme Lydia Mutsch (LSAP). - Ech hun dräi Punkten, Här President, firwat et wichteg as, sech schnell konkret

Iddiën iwwer déi zukünfteg Neinotzung vun den Industriebräachen ze maachen.

Hir Rekonversioun as vun enger zentraler an nët nëmme symbolescher Bedeitung fir d'Zukunft vun eisem Land, a besonnesch fir de Süden.

Et as e Bewäis, datt et eis mat der Dezentraliséierung eescht gemengt as, souwuel a puncto Infrastrukturen, wéi och a puncto wirtschaftlech Entwécklung vun der gréisster Region vum Land.

Et as eng onbeschreiblech Chance, fir iwwer zousätzlech Notzflächen eng Region ze valoriséieren, déi an de leschte Jore massiv ënner dem Ofbau vun der Stolindustrie ze leiden hat. Et as eng Chance a puncto Urbanismus, Wunnéngsbau, Kultur- a Fräizäitinfrastukturen, an nët zulescht eng Chance am Hëlbäck op d'Schafung vun zousätzlechen Aarbechtsplazen am Kader vun der Grande Région.

Ech ka mech kuerz faassen, well déi Propositions de loi an der Commission de la Culture, respektiv an der Commission de l'Education nationale diskutéiert gin. Gläichzäiteg wësse mir, datt d'nächst Woch d'Diskussioun am Kader vum Débat iwwer d'Friches industrielles méi wäit féiert an iwwer d'Suggestiounen, déi hei um Dësch leien, erausgoë wäerd.

Et kann een awer elo scho soen, datt d'Iddi vun engem Campus universitaire "Terres Rouges", déi schon 1993 an engem Dokument ausgeschafft gin as, dat vun der Escher Gemeng an Zesummenaarbecht mam OGB-L, der ASJ an aneren Associatiounen erausgi gouf, eng interessant Iddi as, och wa si zum Deel eng aner Orientatioun hat. D'Terres Rouges egent sech duerch seng gënschteg Lag an direkter Noperschaft vum Escher Zentrum, vum franséische Grenzgebitt, a mat sénger gudder Verkéierssituatioun ganz gutt, fir zu engem Site ausgebaut ze gin, deen duerch eng Neinotzung der Stad Esch an de Regioun ronderëm zegutt komme kann.

Iwwer Belval as scho mat Recht gesot gin, datt mat a ronderëm d'Rockhal e Site entsteet, iwwer deem seng zukünfteg Notzung mir hei an der Châmber nach méi wéi eng Kéier schwätze wäerten.

Ofschléissend wëll ech nach eng Bemierkung maachen, déi mir perséinlech um Häerz läit.

Eist Land war während Joren eng eenzeg Solidaritéitsgemeinschaft, fir d'ARBED als feste Faktor vun eiser Wirtschaft ze erhalen, respektiv ze ënnerstëtzen. Dofir dierf d'ARBED sech nët selwer zu enger banaler Immobilière degradéieren, déi Präisser fir verbrauchten an zum Deel polluëiert Terrainen héichdreiwéi wëll. Och d'ARBED huet eng Obligatioun vis-à-vis vum Lëtzebuerger Land a misst déi Terrainen, déi sech fir d'Rekonversioun, respektiv d'Neinotzung eegnen, eis zum symbolesche Frang iwwerloossen.

Et wär un der Regierung, fir doriwuer eraus iwwer d'Kreatioun vun engem seriö dotéierten Entwécklungs-

fong an Zesummenaarbecht mat de concernéierte Gemengen ze beweisen, datt et hir mam Beméien ëm d'Zukunft vum Süde vum Land eescht gemengt as.

Ech soen Iech merci.

M. le Président.- Domat wär d'Diskussioun an dee Punkt vum Ordre du jour ofgeschloss. Mir kommen dann elo zu enger Rei Questions avec débat.

De Minister Luc Frieden huet d'Wuert gefrot.

9. Questions avec débat

M. Luc Frieden, Ministre du Budget.- Ech wëll jhust eng prinzipiell Fro stellen, Här President. Ech stelle fest, datt nach 7 oder 8 Deputéiert heibanne sin. Et as gesot gin, datt déi Questions avec débat vu gréisster Wichtigkeet fir d'Parlament sin an dofir nët schrëftlech gestallt géife gin.

Dofir wollt ech jhust d'Fro stellen, ob d'Parlament nach un den Äntwerten interesséiert as oder ob et méi opportun wär, fir déi da schrëftlech eranzegin, fir datt all Deputéierte se da liese kann. Ech wollt jhust déi Fro stellen. Ech sin awer selbstverständlech bereet, op d'Fro ze äntweren, grad wéi d'Mme Delvaux bereet as, op déi Fro ze äntweren, déi si betrëfft.

Une voix.- Les absents ont toujours tort!

M. le Président.- Dat as um Ordre du jour esou virgesinn. Den Här Calmes dréit séng Fro dann elo vir, well et huet kee Wäert, fir se op d'nächst Woch ze verleën. D'Äntwert gët jo souwisou publizéiert.

Den Här Calmes huet dann elo d'Wuert, fir séng Fro virzedroen.

Question 10 avec débat de M. Emile Calmes relative à la réforme des allocations familiales

M. Emile Calmes (DP).- Här President, et hënnert de Minister näischt drun, d'Äntwert och schrëftlech eranzegin.

Et geet drëm, datt d'Kannergeld ëm 12.000 Frang an d'Luucht gaangen as. Op där anerer Säit as den Abatement fiscal ëm 12.000 Frang erofgesat gin. Séngerzäit as ëmmer mat all Déterminatioun drop higewise gin, datt dobäi keen eppes verléiere géing. En Artikel, deen ech am Journal gelies hun, seet, datt verschidde Leit iwwer de Wee vun de Steiere manner hätte wéi virdrun.

Ech gin Iech e Beispill vun enger bestuetener Koppel mat engem Kand. Déi bezuelen elo bei 84.600 Frang 1.064 Frang Steieren, virdrun hu si jhust 39 Frang Steiere bezuelt. Déi kréien dann elo 1.000 Frang Kannergeld manner. Déi bezuelen dann elo 25 Frang méi Steieren. Dat mécht wuel nët vill aus, mä et muss een och soen, datt dee Loun do och nët an den ieweschte Kategorië läit.